

Pupuk moral melalui seni pertahanan diri

BH 29 JUL 1994

KUALA TERENGGANU, Khamis — Seni mempertahankan diri adalah unsur penting bagi membentuk sikap dan nilai moral yang tinggi sesebuah bangsa, kata Datuk Seri Dr Mahathir Mohamad.

Perdana Menteri berkata, dengan menjadikan disiplin termasuk kawalan diri sebagai asas, seni mempertahankan diri boleh membentuk generasi muda supaya lebih bertanggungjawab.

Selain itu, kata Dr Mahathir, seni mempertahankan diri juga boleh membantu pembinaan bangsa dan nilai kemanusiaan.

"Dalam keadaan dunia hari ini yang golongan lemah dan tidak berkuasa ditindas secara terbuka, menjadi tanggungjawab sosial kita untuk menerapkan kefahaman di kalangan generasi muda mengenai perkara benar dan salah serta kepentingan menjunjung nilai moral yang baik," katanya.

Perdana menteri berkata demikian ketika merasmikan Kejohanan Taekwondo Sedunia Ke-9 di Stadium Sultan Ismail Nasiruddin Shah di sini,

hari ini. Lebih 900 peserta dan pegawai 70 negara menyertai kejohanan itu.

Hadir sama ialah Raja Muda Terengganu, Menteri Besar Tan Sri Wan Mokhtar Ahmad, Menteri Kebudayaan, Kesenian dan Pelancongan Datuk Sabbaruddin Chik serta Presiden Persekutuan Taekwondo Antarabangsa (ITF), Jeneral Choi HongHi.

Dr Mahathir menyifatkan kejohanan itu sebagai tempat sesuai untuk memupuk semangat setiakawan ke arah mewujudkan keamanan dan muhibah sejagat.

Menurutnya, kejohanan taekwondo antarabangsa itu bukan saja membantu usaha promosi kerajaan negeri, malah menggalakkan pelaburan asing serta tempatan untuk menanam modal di Pantai Timur.

"Kejohanan ini juga adalah peluang terbaik kepada peserta dan delegasi untuk mengenali satu sama lain. Ini akan membantu mengukuhkan hubungan di antara Malaysia dan negara lain terutama dalam bidang budaya negara peserta," katanya.